

KERWEREDD 1989

Bevor ich eich jetzt begrieße
dun ich den Kerwestrauß met nie kräftische Schluck begieße

Straußmäd: “Die Nerremorer Kerb soll lewe...”

Ich begrieß Eich herzlich zu unserer Kerb
Ehr vom Gänsehiwwel un vom Berg

die vom Hodeeck, von de Hauptstroß unn Friedhofstroß
a die vom Wänerstahl un vom Eilbacherhof

Ich begrieß die Leit met unn ohne Hiet
unn a die paar vom Neibaugebiet

Weiter begrieß ich die Kerwegäschd aus Nah un Fern,
die Kinner, die Alde, die Dame unn Herrn

Schä, daß ner all kumm sin, fer se heere,
wie ich Eich es Dorfgeschehe glossere.

Mer mache Eich nur Fräd un kee Schann,
ich hoff daß ner all Veständnis hann.

Un dun eich a net eire,
sunscht vegeht uns die Luscht am Feire.

Ich kann Eich sieh do unn sitze
un ich steh do howwe un muß schwitze.

Drum spelt unser Musik das Lied von de Walz:
“Auf ehr Brider in die Palz”

Iss das net schäh, ehr liewe Leit,
es iss werrer Kerb, es werd jo a langsam Zeit.

Bei uns im Derf hat die Kerb 3 Jor lang geschloof,
jetzt han se die Landfraue werrer ans em Grab gehob.

Wee de nei Krankekassereform fum Norbert Blüm, dem Bonner Boss,
hann sich die meischde noch vorsjohr e nei Esszimmer mache geloss.

Das iss vorteilhaft, unn verjingt die Fassade
so kenne mers uns leischde als Straußmäd Eich inselade.

Mer han zwar genunk Jugend, die gehn a gere fort,
nor wisse die net, wie mer halt die Kerb in unserm Ort.

Ann de Glotze un am Kombjuter kenne die sich aus,
nor bringt mer käner vun denne hinnerm Ofeloch eraus.

Ehr Neerermorer Buwwe, dasjor wolle mers eich wise,
es negscht Jor sinn ehr dro, ehr gehere doch net schun zum Alteise.

Ehr Musik spele unserer Jugend ganz lescheer
Kerb halle wär jo gar net so schwer, wann sa blos im Kombjuter vorprogrammert wär.

Straußmäd: "Wem iss die Kerb"

Do owwe uff em Gänsehiwwel wohnt e Rentner ristisch unn fleisisch,
mer kennt männe, er wer erschd so Mitte Dreisisch.

Beim Arweiterverei hat er so mansches dirischird,
wan ders in die Hand genumm hat, hats a glei fungsjonirt.

Äns gehert veleischt besonerschd erwänt,
so lang wie der Vorstand war, hats am Felsefesched net geränt.

Was der sich so ufbaut unn was er schun schuf,
ehr kenne mers glawe, das hat Hand unn Fuss.

Wann in Neremor noch känner hat gemach e Finger krumm,
do hat de Walder achun die Frischischd erum.

Er fart met seim Bulldogg met Geknatter
eniwwer zu seim Herrgoddssagger.

Do hat er sich geschunn unn gekweelt
unn sich e Weibersch ogeleet.

Gans profilhaft, gans efach klasse,
so wie am Rei, nur noch met Terasse.

Lang hat mer nor feele Pehlscher gese
mer war nor noch am zweifele, was dort iss am entstee.

Doch jetzt kammer sieh, wie die Rewe spriese
un es negschd Jor kammer unser Kerwestrauß met Neremorer Wei begieße.

Ehr Musikande, spele dem Wei-“BAUER” gans fein:
“Ich blans mer selwer mai Wein,
do wäs ich a, de Wein is rein!”

Vorsjor an unserm Maiefeschd
war a es Elsje unner de Gäscht.

Wie ehr wisse hats jo e weh Knie,
drum kanns halt a nur schlecht geh.

Es Esse schmeckt em, drum iss a die Woo
um e paar Pund kräftisch iwwerzoo.

Wie dann de offizelle Däl vun dem Feschd war erum,
do ments, fun wem wer ich dann heit heemgebrung.

Wer fährt dann do hinner, hats iwwerall gefroht,
doch kenner war met seim Auto do.

Do erbarmt sich de Wolfgang, das war e Hallo,
fer was han mer dann es Feierwehraudo do.

Das war e Sensation, met Blaulichd un Trara
hat er es Elsje met de Erbsesupp hemgefah.

Die Musik speelt em Elsje jetzt zur Ehr:
“Zum Glick hat Neremor e Feierwehr!”

Straußmäd: “Wem iss die Kerb?”

Bei uns im Ort gebts e Fraa, die kanns net erwarde,
die geht jede Morje in ehr Garte.

Doch was se do so erblickt,
fun dem isse garnet entzickt.

Sie guckt unn guckd unn kanns net vesteh,
das bei ehr im Garde es Wachstum tut rickwärts gehe.

Sie iwwerleht unn iwwerleht unn wäs sich gar kee Rot,
so entschlisst sie sich zu äner Bodebrob.

Das Ergebnis war soweit gans gut, nor e bisje sauer,
schuld war do dro vielleicht die nah Mauer.

Bei de Nochbarschaftd erweckt es Interesse,
die mähne, do wäre die Blattleis am Fresse.

Das will die gut Fraa doch genauer unnersuche,
unn nemmt zu de Brill a noch die Lupe.

Unn so geht se met dem Vegresserungsglas
Daach fer Daach uff Blattleisjachd.

Die Musik speelt der schlau Gärtnerin:
“De Worm iss in meim Garde drin!”

Straußmäd: “Wem iss die Kerb?”

Do owwe uff de Pels hats das Jor schun gans schä kritisch ausgeseh,
kenner hat gewisst, wie des soll mem Aweiterverein weitergeh.

Bei de zwet Generalvesammlung, was sinn das ver Knepp,
Do hat äner met drei Kreizjer unnerschrepp.

Doch jetzt lebt die Fels werrer uff,
de Heini uns Erika gehn enuff.

De Arbeiterverein hat sich zwä neie Wertsleit genumm,
die bringe denne Lade schun werrer in Schwung.

Sogar ware in ledschder Zeit
e Grupp fleisische Männer aum Awetsinsatz bereit.

Samschdaachs han se sich immer getroff
unn han die Closetts am Kanal a geschloss.

Im Michel iss dodebei e Maleur bassert.
De Doktor hats dann a werrer kurriert.

Er hat sich imme unglückliche Moment
beim Schebbe unn piggele es Kreiz ausgerenkt.

Er hat sich iwvernumm beim Schaffe,
warscheins isser das net gewehnt vun Paffe.

Die Musik speelt denne Arweiter zum Dank:
“E mol was geschafft unn schun drei Woche krank!”

Straußmäd: “Wem iss die Kerb?”

Do neilich iss bei uns was bassert,
mich hat beinah de Schlag gerehrt.

Es war Montachmorjens, ich guck grad es Fenschder enaus
un sieh wie e Wutz drauß in unserm Vorgarde haust.

Un hinnerher sinn gerennt voller Eifer
de Otto, de Gesell unn de Meischder.

Vorsichtisch hau se sich a'gepirscht, met allerhand psichologische Tricks,
Doch wie das die Sau gespannt hot, wars met dem infange nix.

Do hat se quiekend reisaus genumme,
de Vesuch der war mißlunge.

Ich kann eich saa, das war e Nummer,
de Vorgarde nuff, de Vorgarde nunner.

Uff emol, do macht de Meischder e Satz,
do hat er die Sau an de Ohre gehad.

De Gesell, der steht met em Strick schun parat
unn binnt ne klei am Hinnerlaaf a.

Doch plötzlich, ich sahns eich, ehr Leit, es iss kä Stuß,
do leit de Kalli unner de Wutz.

Er halt se an de Vorderleif met ledschder Kraft,
ich denk noch fer mich, ob er das wohl schafft.

Dann kreischd de Otto: "Was soll dann das werre?",
do loßt de Gesell es Strickelche werrer schnerre.

Do wetzt die Wutz - es waggele die Wade
schnurstracks an de Kinnergarde.

Fun dort aus han se se dann met ein Ämer uff de Schniss
hinnersich werrer rumgeriss.

Die Musik speelt no de Melodie: "Do werd die Wutz geschlacht..." dem Metzger galant:
"Wie mer die Wutz iwwer die Krautbitt spannt!".

Straußmäd....

Ich han Eich noch was se berichde fum Vaddertag,
do hat die Feierwehr beim Erich e Fete gemacht.

Feiere dun die allegar gut un gerne,
schließlich misse die jo a Feier lösche lerne.

An Esse unn Trinke hats a net gefehlt,
drum dauert das Feschd bis owends spet.

Eichentlich han se net vorgehatt so lang se tage,
deshalb stellt sich jetzt die Beleichtungsfrage.

Doch em Erich fällt immer was in,
deshalb kummt em a klei in de Sinn:

“Ich mach Eich all Licht unn das fum Herze
am Tannebämche hänge jo noch die Kerze.”

Aus Leibeskreft hert mer die Feierwehr singe
durchs ganse Wissetal dut die Weihnachtsmelodie erklinge.

Ehr Leit fun de Feierwehr, do hätt ich e Idee:

“Vielleicht kennt mer Weihnachde uff de Vaddertag veleh!?”

Die Musik spelt dene Feierwehrleit met erm Licht:

“Nach Hause, nach Hause gehn wir noch nicht!”

Straußmäd: “Wem iss die Kerb?”

Die Turnergrupp fum Landfraueverei,
die iss iwwerall gere debei.

Mol gehn se wannere, turne orrer schwimme,
in de Alaache grase orrer sich beim Radfahre trimme.

Do neilich hanse beschloss, uff Schschters Rappe
e Wannerung no Nanzwiller nlwwer se mache.

Erschd laafe se durch die Brihlwiss, doch was entdecke die Mäd,
de Weg war am Enn unn es Gras noch net gemeht.

Doch das konnt die Landfraue net umschmeise,
do rufts Karola: "Auf, mer gehn iwwer die Gleise!"

Doch weil die Streck stillgeleht iss do iwweenaus,
wäre die Eisebahnschiene schun längst eraus.

Das war e Kunschtstick uff denne Wacke se laafe,
denn die meischde hatte nor o die Sandale.

A sonscht han se kee Ausweg geseh,
links unn rechts gings nor steil in die Heh.

Tapfer gings weiter, sie wollte grad singe,
do ment es Erika: "Do kennt mer doch rickwärts aus de Socke springel!"

Denn das hat scheinbar als erschdes gemerkt,
die Brick iwwer de Glan die war jo gesperrt.

Met Gelächter unn Hallo
han se sich an de Äschdtcher die Böschung e nunner gezoh.

Ich kann Eich nor saa - fer die negsch Wannerung dun ich klei morje
Eich e Nerremorer Rundwannerkart besorje.

Die Musik spelt der Turnergrupp aus voller Bruscd:
“Das Wandern ist des Müllers Luschd!”

Straußmäd....

Ehr wisses jo all, je älder mer wert, desdo mäh
muß mer zum Dokdor hi gäh.

Wenns nimmi klappt beim schaffe unn die Luschd em vegeht,
do wert emol e Kur ingeleht.

Die Owendungen warn supper, e Schatte hat mer sich a ogelacht
unn wie das so geht, no 4 Woche werd sich uff de Hämweg gemacht.

Met de Eisebahn gings schnell zurick.
In Landstuhl am Bahnhof wart sehnsuchtsvoll de Ehemann voller Glick.

Ach wie war die Wiedersehensfreude doch so heiß,
gekißt unn gehall hat mer sich schun am Gleis.

Eng umschlunge unn gans beglickt
hat se de Horst dann zum Audo gedrickt.

No 4 Woche hat mer sich jo se vezehle allerhand
unn do debei veloßt em e bisje de Vestand.

In Neremor okum, oh Graus, oh Schreck,
do war jo tatsächlich de Koffer weg.

Das de Koffer net do war, das war gar net so dumm,
dodefor sin se drei Daa net aus em Bett erauskumm.

Vier Woche Trennung, das iss so e Ding,
do hanse sovel nogehol, wie's nur ging.

Die Musik spelt der Postlerin gans fein:
"So eine Kur, die müßte öfters sein!"

Straußmäd...

Bei unsre Straußmäd iss e Fraa debei heit,
die iss jederzeit zu Unfug unn Spaß bereit.

Drum will ich Eich fun änner Geschichte
heit an unserer Kerb berichde.

Mem Plaanwaa war se in Gesellschaft unnerwega
unn hat e schöner Daa velebt.

Sie war gans häppi, die Stimmung war gut,
es Wedder war herrlich unn es Hedi frohgemut.

So isses stickwegs met em Saarbricker Hans
im Plaanwaa hinnerher getanzt.

Uff em Hämweg wars e beschlosseni Sache,
noch e Abstecher iwwer de Eilbacherhof se mache.

Dort steht e Poni unn ens, zwä, drei,
ruft es Hedi: "Das do is mei!"

"Jetzt will ich eich e mol ebbes zeichel!",
un wie e Blitz hockts druff unn will reite.

Ach Gott ment sei Mann: "Was sin das fer Sitte?!"
Du bischt doch noch nie uff em Gaul gerittel!"

De Start war gut bis no 50 Meter,
doch dann ehr Leit, do kummt das Gezeter.

Das Poni, das bockt uns Hedi kreischt
Caramba, Caracho - bums do leischt.

Die Musik spelt dere Fra gans rasant:

“Sicherer isses, wammer de Gaul vor de Wage spannt!”

Straußmäd...

Kerzlich iss fun hie, e älderea Ehepaar
uff de Reinlandpalzdaa an die Mosel gefar.

Sie han sich amisiert, gut gess unn de Moselwei getrunck,
unn beim Umzug de schöne Moselanernne begeischderd zugewunk.

Doch wie's halt so iss - alles Schöne hat sei Enn,
sie setze sich in ehr Audo unn fahre hääm.

Bereits unnerwegs - die Fraa sitzt am Steier -
isses dem Ehemann garnet geheier.

Er quelt sich erum unn kummt ins Schwitze,
sei dritte Zäh - die dun dricke in de Ritze.

Drum zieht er net nor sei Jacke aus,
er macht a klei sei Gebiss eraus.

Dann kriecht er so e Gefühl, als wenn fun do unne ruff was käm,
doch mittlerweile warens endlich dehäm.

De Paul greift sei Gebiss unn sei Jacke - gans blass sieht er aus –
un jetzt nix wie dabber aus em Audo eraus.

Er saht zum Cilli: "Brauschd net se warde.
Ich schnapp noch e bisje Frischlufd im Garde."

Un wie's em dann werre besser tut gä,
durchfahrt ne e Schreck: "Ei, wo han ich mei Zäh?"

Druff duht er mem Cilli de Garde durchkämme fun vorne bis hinne,
sogar die Plänsjer han se umgedreht, doch fum Gebiss war nix se finne.

Soo konnt er uff jede fall net unner die Leit unn es kaue macht Sorje,

drum lost er sich e nei Gebiss omesse glei am negschde Morje.

Die Fraa Nachborsch, es Dilschers Merie, die fleisch Fraa,
die war in erm Garde am selwe Daa.

Uff emol schnerrt se uff - sie ment, es trehd se e Gaul,
do leiht zwischem Salat jo wahrhaftisch e Stiok fum e Maul.

Ei Jesses denkt se, dass iss jo e Ding,
wer war dann do in mein Garde drin.

Doch dann hatses glei kabert,
das kann nor em Paul sinn un iss niwwer maschert.

Der hat sich gefräht - das war e Hallo,
sei dritte Zäh warn werrer do.

Doch wie das Gebiss in de Garde kumm iss fun de Merie,
das bleibt wohl e Rätsel, das grenzt an Magie.

Die Musik spelt dem Ehepaar sehr fein:
“Oh Mossella, du hast ja soviel Wein!”

Straußmäd...

Am 18. Juni ware die Wahle,
das war fer manscher vebunde met gans schöne Quale.

Die Briefkäschde ware voll met Wahlpropaganda
unn die Plagade hinge an jeder Mauer unn Veranda.

E Kart funn de Palz hammer kricht, das iss jetzt seit neischdem Mode,
uff de Rickseit ware die Wahlvorschläg - das sin vielleicht Methode.

A funn Rad- unn Wannerwege hat do was gestann,
nor sinn die meischde noch gar net vorhann.

Das Kommuliere unn panaschiere bei uns im Staat
hat ergeb e gewisser Schwierigkeitsgrad.

So hat manchi Fraa unn mancher Mann
iwwer e halwe Stunn im Kabeisje gestann.

Uff die Auszählung hat jeder gelauert,
bloss bes die do war - das hat jo ewich gedauert.

Mer wolle jo hoffe, das jeder gelernt hat aus der Wahl met ere Ticke,
denoh hat mer jo die Parteibrider schun werre zusamme gesie enner schlicke.

Straußmäd...

Ich merk allewei die Glieder wern schwer,
ach wann doch emol das veele Vezehle net wär.

Ich män allemol, es langt fer das Jor,
ich han doch heit a noch was anneres vor.

So jetzt gugge mich nochemol o zum Schluß
unn wann ehr lieb sinn, griener a später allegar e KUSS.

Ich hoffe, daß er noch all e bisje sitze bleiwe,
um met uns die Nerremorer Kerb se feire.

Awwer bevor mer jetzt es Esse uns Dringe genieße,
dumer se erschd noch unser Strauß met Wei begieße.

“Du sollschd es ganse Jor iwwer henke,
daß die Leit noch lang an unser Kerb denke!”

Er brauche eich gar kä Hoffnung se hesche,
daß ich weider mei Maul dun beweche.

Nur ens noch im Name fun uns Landfraue will ich mich ohne Schranke
bei unserer Werkvolkkapell gans herzlich bedanke.

Die ware nämlich sofort bereit, uns beim Umzug un de Kerwered musikalisch se begleide,
das is awwer fer unser Dorfgemeinschaft e gutes Zeiche.

Die Musik gehert zu de Kerwered in jedem Falle,
nor so kenne mer die Nerremorer Kerb erhalle.

Mer hert, das was bei uns los iss bes zum Derf enaus,
jetzt ehr Leit fer unser Musigande awwer e kreftischer Applaus.

So, jetzt gehn ich do runner, so lang wie ich bin,
unn griß eich nochemol all wie ner do sinn.

Ich san Eich Tschiß unn Aufwidersehn
unn feiere mer blos noch die Kerb recht schön.

Straußmäd: "Wem iss die Kerb?"